

仰视千七百二十九鹤斋丛书

仰視千七百二十九鶴齋丛书

存漢錄

鄧高斗樞撰

崇禎丙子予以湖廣副臬備兵長沙庚辰晉右叅政
辛巳六月聞報晉臬長移守下荆南駐鄖陽鄖故流
賊出沒已十年矣先是庚辰春閣部楊公旣敗張獻
忠獲其妻妾及軍師潘獨鰲不卽殺而寘之襄陽獄
中獻賊入蜀李自成羅汝才及老猓猓革里眼諸賊
繼之蜀撫邵公捷春力不能拒致被逮閣部統諸部
兵追至蜀中戰守逾年賊勢愈熾至辛巳正月賊復

奔楚閣部迎戰於楚蜀之交兵大潰獻賊遂從歸州
取間道疾馳至襄襄有防守兵數百賊啖以利反爲
賊用二月初三日夜半城中四面火起官民俱不知
所繇已而道臣張君克儉及郡邑各官俱被殺襄王
亦遇害皆防守官兵所爲也次蚤天明獻賊至各兵
迎之以入遂取其妻妾及潘獨鰲以去報聞天子大
怒爲逮撫臣袁公繼咸然袁公先奉閣部檄駐竹山
去襄千里實非其咎鄖道萬君言策亦被黜於是以
右叅政王公永祚晉鄖撫予遷鄖道而襄道則調叅

議冒君起宗云

予以七月初六日長沙解纜至荆而臥疾數日月盡達襄陽城中一片焦土向來塵市止存頽垣敗壁居民十無二三皆葺草以居官署僅有新葺數間徘徊信宿啟行入鄖則八月初六日矣鄖城四圍僅六里又半爲甌脫居民不滿四千外六屬俱爲賊破每年四五次蹂躪惟郡城獨全然城外關廂俱燬無一居民田疇俱爲蓬蒿數百里如一惟近城之田則城中人耕種以餬口是年蝗飛蔽天野無寸草也七月間

獻賊復繇鄖入秦督師丁公與左鎮尾之而至左兵
二三萬一湧入城城中無一家無兵者淫污之狀不
可言數日啟行復罄洗其家以去去十餘日而予至
米菜俱無可覓士民相見無不痛哭流涕不恨賊而
恨兵真慘極矣大約自荆至襄所經荆門宜城城邑
無恙而村落已空然猶有十一二僅存者自襄至鄖
則城邑已不堪言而出城竟不見一人村落止存廢
趾欲覓一椽一瓦俱不可得矣若鄖之六屬房縣竹
山竹谿上津鄖西保康并城郭俱已平夷城趾俱一

片蓬蒿居民僅存者俱覓山之高而上有平岡者結
砦以居大縣可三十砦小縣不過十餘砦砦之大者
可二百人小者不滿百人各墾砦下之田以自給縣
令至者亦居砦上征輸久停民貧無訟胥役盡逃令
與民大率並耕而食不復能至郡叅謁矣

余以初八日履任至十三日忽接猛將軍如虎檄報
獻賊復東來立可至鄭是時鄭兵俱發往北路蓋因
賊旣西入秦恂秦兵嚴守必折而從北也不意仍從
西來須臾猛將軍至兵僅百許次蚤獻賊至予率垛

夫登陴固守賊亦不知城內無兵而又盧督師在後
竟引而東而城中士民復大恐謂左兵當復經此也
余卽遣役往迎督師且懇其兵無入城督師答書已
許不入城而托予於城外覓數間小房欲暫住以登
疏余先以督師書傳示士民人心始定明日督師至
駐一關帝廟湫隘殊甚又十日始東左鎮意殊不懌
以沮其入城也猛將軍係虜中降將驍勇善鬪是年
冬戰死於南陽城上

鄖城舊爲治院所駐是時澄川王公移鎮於襄而鄖

中共事者守徐君起元倅陳君萬家李則朱君翊辯
也營將則房竹營游擊李茂春兵一千五百均陽營
游擊胡廷聘兵五百守均其留鄖者一千而治標左
營百總楊明起余啟凡各兵三百許人游擊王光恩
兵可三百許則降丁也余因周視鄖地東與北俱山
麓而西與南俱江漢賊善騎而不習舟楫余謂戰地
必在東與北漢水西北來離城僅丈許行半里遇一
小山名曰西壇遂折而西繞西壇之外復折而南沿
至東南城下離城亦止丈許予乃於西北及東南兩

隘各繕一樓一面倚山一面倚城一面倚漢水各甃以磚樓上多設銃礮樓下開一門以通出入李茂春之兵卽營於東南樓之內沿南城外而居西壇高出於城丈許不可無兵而山頂頗平量可容兵數百名則令楊明起居焉西壇之下地平如掌當城之西南則王光恩居焉城東亦有二培樓一曰四鋪觜一曰青龍寺離城甚偏余令余啟凡居四鋪觜分均陽營兵三百名居青龍寺其均陽餘兵則居城中備城守及他調發之用均陽兵皆鄖城人與鄖民俱親族在

各營中獨守法故留之城中其城北素無濠城東雖有濠而淺地勢陡峻不能蓄水余令東北離城丈許各築土牆高八尺每堵留一銃眼凡閱三月而四城防守之事俱備其一切築牆造樓及葺蓋兵房皆用各營兵而不煩一民云

辛巳之冬壬午之春鄖城幸無賊警夏間忽接陝西興安道檄稱川北有賊名搖天動先時同羣賊入蜀厥後各賊東走而此賊遂獨留川北今將從興安趨竹山以及鄖襄約有萬餘予令房竹營千總漆尙友

均陽營千總高萬錦并楊明起合兵禦之賊聞竹山有備遷延不敢入境仍歸川北至九月閒王光恩來云有弟光興在搖天動內有眾數百情甘投順余未之許而光恩請愈懇余令光恩招之至汰其老弱者得精壯百五十人卽隸光恩營光興改名光泰後李賊犯鄖光泰戰甚力

先是張李各賊每陷一城輒大掠以去至壬午夏秋李自成羅汝才每得一城輒分賊防守且嚴禁搶掠以籠民心時已得中州數郡將取襄鄖而左大將軍

自開封潰後久住樊城全無赴賊之志治臺王公澄
川亦留左於樊以衛襄謂大兵在賊必不至也及自
成汝才由汝甯趨襄左聞風先遁至荊州又念荆以
江爲界無路可逸又改往武昌而賊遂長驅抵樊徘徊
數日以大礮擊襄之北城襄人大恐一時文武先
取其家屬登舟矣賊復西去七十里至白馬灘渡江
王公澄川竟護福清王東下賊遂入襄時十二月初
三日也初八賊分股攻均州時降丁惠登相在焉登
相隸左大將軍而分居於均素獷悍難馴不屬鄖節

制至是斂兵登武當依險自完賊遂入均守將高萬
錦自溺漢江以死十二日賊抵鄖城予率各營戰於
城外時王光恩光泰楊明起余啟凡戰甚力賊攻四
鋪觜青龍寺晝夜不息啟凡等以火罐擲之焚死者
相踵而攻不止然終不能登賊又分股直抵北城予
於土牆內先伏鳥鎗手擊之百發百中賊不能近至
十五日賊始退是月荊州承天相繼俱陷

方賊繇白馬灘渡江鄖襄路斷故鄖中久不知襄陷
也及攻鄖而退兵追之獲賊五十餘人始言襄陽情

形李茂春素懼怯始有懼色且謂治院已東去鄖兵
月餉將安出而惠登相在武當書貽茂春勸其遠避
否則賊再來必不支茂春遂於十七日夜拔營西去
余親往留之竟不能得次日茂春將抵金漆潦會叅
將徐勇先奉治臺檄守潦茂春不能過而營內船少
各兵多步行兵婦無不嗟怨又四鄉無一民居無所
得食於是茂春大窘復統其兵來歸余下令各營謂
茂春罪在不赦而裨將及各兵則不妨招之入營茂
春必須生擒議罪於是王光恩楊明起余啟凡各招

房竹營兵盡降而茂春就擒余縛送徐叅將勇令其
羈於營內以候請旨後勇亦去金漆潦至興安茂春
隨之以去又數月茂春病死光恩等三人旣分招房
竹營兵又各有召募三營之兵各盈千而高萬錦死
後其兵亦歸鄖仍入均陽營於是鄖兵有四千云
癸未春李自成與羅汝才同駐襄陽時已據襄荆承
天德安並汝甯南陽河南開封諸郡矣自成志圖僭
位欲先吞并各賊時獻賊在安廬黃州一帶自成每
與書檄皆用上司臨屬吏體獻賊大怒然畏自成之

强不敢與較亦不敢復與自成合營矣老獍獍革里
眼各股自成以計除其魁帥並將其眾惟汝才勢力
相敵自成潛欲除之忽於三月初六夜自統精賊百
餘直至其營排闥而入斬汝才於臥榻之上汝才部
下初多不服自成百計籠絡半月始定於是中原無
爲難者一憑自成所爲矣

惠登相在武當自成屢招之登相見誅鋤同輩懼而
不往自成大怒令賊劉某統兵三萬往擒登相隨攻
鄖城登相聞之逃往興安賊追之不及遂於白河一